

# Bi 2015 Aen Hoih Daengx Gih Cuengh Gun Song Vahsaw Sonhag Damqra(Benq Baihbaek) Youq Vanzgyangh Hai

## 2015 年全区壮汉双语教学研讨活动(北片区)在环江举行

□ Bonjbauq gicej Veiz Yennaz/韦愿娜



▲ Swcigih Gyaauyuzdingh minz-gyaucu cucangj Veiz Lanzmingz youq gwnz hoih gangj vah.



▲ Gvangsiah Minzcuz Gyaauyuz Fazcanj Cunghsinh yizsinj Lingz Hinghningz youq gwnz hoih gejdap gij vwndiz daihgya daez ok haenx.

Vihliux cunggez gyauhliuz Cuengh Gun song vahsaw gyaauyuz sonhag gingniemh, daezsang lauxsae Cuengh Gun song vahsaw sonhag suijbingz, coicaenh hong sonhag sawqniemh Cuengh Gun song vahsaw yamqonj fazcanj, 5 nyied 28 hauh daengz 29 hauh, Swcigih Gyaauyuzdingh Minzcuz Gyaauyuzcu youq Vanzgyangh Mauznanzcuz Swciyen hai aen hoih “Bi 2015 Daengx Gih Cuengh Gun Song Vahsaw Sonhag Damqra(Benq Baihbaek)”.

28 hauh ngoenzde, miz 130 boux Cuengh Gun song vahsaw sonhag gyaauyenzienz caeuq lauxsae Sawcuengh ak haenx bae daengz Vanzgyangh Mauznanzcuz Swciyen Swh'wnh Cin Yinzhoz Siujoyz, dingq goq sifan sonhag Cuengh Gun song vahsaw. Yinzhoz Siujoyz lauxsae Sawcuengh Cinz Yivangj caeuq Vangz Denzcwnng song boux lauxsae hawj daihgya hwnj dangz Sawcuengh. Song boux lauxsae hwnj goq cungj

guh daengz sonhag muzbyauh mingzgoz, lohnaemj cingcuj, sonhag fuengfap lingzhoz lai yiengh, doedok cungdenj. Hoeng, song boux sonfap youh gak miz daegdiemj: Cinz lauxsae youq hwnj goq moq gaxgonq, sien daezok vwndiz, hawj hagseng daiq aen vwndiz bae doeg saw, bae lijgaj gij eiqsei ndaw saw. Vangz lauxsae cix doenggvaq mbaw gajben gwnzde sij miz singmeh yinhmeh Sawcuengh haenx, hawj hagseng bae gyoepyaem, youh hawj hagseng guhcaemz daeuj nyinhrox cihmoq. Song boux lauxsae hwnjdangz ndei raixcaix, ndaej daengz gyoengq boux gyaauyenzienz caeuq lauxsae Sawcuengh ak haenx haenhndei. Boux lauxsae Sawcuengh ak Vujmingz Yen Gingloz Siujoyz Luz Cenzyau dingq goq le haenh naeuz: “Gij sifan goq Cuengh Gun song vahsaw Yinzhoz Siujoyz neix, dwg gij denjfan Cuengh Gun song vahsaw sonhag gih raeuz.”

29 hauh ngoenzde, youq gwnz hoih guh bingz goq caeuq damqra haenx, gyoengq gyaauyenzienz caeuq lauxsae bouxboux cungj haengjheij gangviah, gangj ngeixfap swheij. Daihgya siengj gangj couh gangj, gangjlwnh ndaej gig nauhyied.

Gvangsiah Minzcuz Gyaauyuz Fazcanj Cunghsinh yizsinj Lingh Hinghningz youq gwnz hoih sijsaeq gejdap le gij vwndiz gyoengq lauxsae daezcam haenx.

Swcigih Gyaauyuzdingh Minzcuz Gyaauyuzcu cucangj Veiz Lanzmingz youq gwnz hoih daezok seiq diemj yauhgiuz: It dwg aeu caenh' itbouh daezsang gij roxnyinh Cuengh Gun song vahsaw sonhag haenx, rox gij yiyei youqgaenj de; ngeih dwg aeu gyagiengz hong sonhag yenzgiu Cuengh Gun song vahsaw; sam dwg aeu yawjnaek conhyez fazcanj gensez bingzdaiz; seiq dwg caux aen gyaauyenz bingzdaiz hagdangz lajmbanj.



▲ Vanzgyangh Mauznanzcuz Swciyen Gyaauyuzgiz gizcangj Cinz Sangi youq gwnz hoih gangj vah.



▲ Vujmingz Yen Gingloz Siujoyz lauxsae Luz Cenzyau daiyauj cujbingzgoq daihngaih gangj vah.



▲ Hagseng hwnjdaiz gyoeb yaemciet.



▲ Dagogenh guh hozdung, hagseng angqyangz diuq fouxsaux.



◀ Boux lauxsae daeuj dingq goq ndeu hawj hagseng doeg Sawcuengh gwnz banjbauq.

▶ Vangz Denzcwnng lauxsae hwnj goqsifan, hagseng dox-ciengj yaengx fwngz dap daez.



▲ Cinz Yivangj lauxsae hwnj goqsifan.

